



Boeremoos mit braodwors

Um te beginne; môt ik ôg iêrlîk bekinne
Van hoès oèt bin ik hiel erg braaf
Maar ôndanks det woort ik toch verslaaf
Jao hopeloos; aan boeremoos
zoë laef dees brave bors
allein op boeremoos mit braodwors
gèn frikkedèl ; gèn rônde of platte nassibèl

Gèn fluiterskiës; gèn groëte stökke koeiebiës
Van kerboèt ; trek ik ein zevezölders snoèt
Nae, Laot daen hiëring maar in d'n hiëringslaai
En die kerse in de kerseflaai
Laot de kiep maar eure kiepebors
En jocus ziene jocus vors
't belangriekste in 't laeve van dees brave bors
is boèremoos mit braodwors
Ander greunte valle beej mich oèt 't tuuënke
Ik smiekel zelfs gèn hielig buuënke
En al zaet de kattegiem in haustök ellef
Wae lauk zeijt , oëgs de wind vanzelf
Nae ôngelaoge waor, veur boeremoos met braodwors,
möcht ich zu fuss nao Grubbevors
op vekantie op Mallorca, baej ik wie zônne tadoea
Heilige Antonius allerbeste vrind
zörg det ik heej örges boeremoos met braodwors vind
zelfs de chinees beej ôs op d'n tômp heb ik opgestoek
dae verköp noow boeremoos met ein hempelke kroepoek
en zit 't ein bietje mej ; kriesse ouk nog sambal bij
Jao dames, ge gluif neet waat ik in ôs kaokbook loos
de leefde van de man geit door ein volle maag met boeremoos
Allein mien kinder 't is ein waore schand
Aete eur boeremeuske met lange tand
Ik zegk dan, dreij neet um daen heiten breij
En schöp ôg op zônne flinke knoedel boeregreij
Luuster Merieke d'r is gen maedje waat dao boëte kin
ikkewaal zaet 't dan, ik bliëf dan lekker smaal en waer mannequin
Gaon eine stinkend riëke kaerel strikke
En hoof van ze laeve gen boeremoos met braodwors miër te bikke
Op eine gooie kwaojen daag midde in 't vorsverlet
Liërde ik verplich boeremoos aete met mets en verket
Mien vrouw haet mich met ein iëzig gezich verbaoje
Um in 't vervolg mien boeremoos te aete mit de viëf gebaoje
Dus steit dao noow zônne telder boeremoos hiel lekker te zien
Meug ik dao neet miër met de hand in bangere, det môt hiel fien
Maar kump d'r ein dampend portie boeremoos aan
Dan rol mich maar feestelik ein eike nao de baan
Det prikkelt van alle kante mien ruukorgaan
daonao gaon ik hiel deep aom haole
dan trek mich die boeremoos lôch wies onder in mien steunzaole

Maar....Mens sana non potest vivere in corpore sicco
Ein gezônde zeel kan neet laeve in ein druüg lichaam
Dus boeremoos met wors wao ik zoë van hald
Doon ik aanlinge met ein paar kretjes venloosch Alt
Maar lig ik smorges op mien zie;
Met in de kop 't geluud van ein laege smeejerie
zeen ik kolonnes katers marchere in ein rie
Dan vluug mich waal ens huppedepup
Mien boeremoos ôntbeitje euver de slup
Met auge op de kneen ; blièf ik alles wazig zeen
Neet van det Alt, nae d'n bril velt mich van de kop
Want van boeremoos aet ik mich de oère van de kop
Met 't boeremoosbal ; is 't beej ôs net de zeuten inval
Ik zeen ganse volksstamme euver de vloër sjauwe
En ein badkuup boeremoos nao binne stauwe
En mien Tien is zônne waus
Det mak ein kaolekit met vette saus
Daomei wuuërt midde in dae boeremoosprak
Zôn môdderig kölsepoetje gemak
Dao umhaer gedrapeerd broen van kors; eine maeter braodwors
jao gooie boeremoos verdeent ein wors met waardigheid
Ein wors is pas ein wors as d'r eine slechter achter steit
Zörg waal veur gooi bièterkes dan guüf 't noeits trammelant
Want mit 't gebit in de hand kriesse gen wors euver d'n tand

Wiel Hermans Venlo